

АКАФИСТ пред образом Божией Матери “ПРИЗРИ НА СМирЕНИЕ”

Кондак 1

Взбранной Воеводе, Владычице нашей Богородице, преславным явлением иконы Ея Святыя, люди богоспасаемого града Киева дивно посетившей, благодарственное возглашаем пение. Ты ж, яко Всеблагая Заступнице рода христианского, от всяких нас бед свободы, и от всех врагов видимых и невидимых защиты, да с верою Тебе зовем: Радуйся, Пренепорочная Богородице Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Икос 1

Ангелов Царица и всея твари Владычице, Пречистая Дево Богородице, милостивым явлением нам образа Твоего Святаго, древле богоспасаемый град Псков, а ныне град Киев благодатно озарила еси и струи чудес от нея источила еси верным. Темже со усердием и любовью припадающе к Пречистому Твоему образу, умиленные моления возсылаем милосердому Твоему к нам заступлению и со страхом зовем: Радуйся, Царице наша Преблагая, Надеждо наша Богородице; Радуйся, Приятилище сирых и странных Предстательнице; Радуйся, скорбящих Радосте и обидимых Покровительнице; Радуйся, яко зриши нашу беду, зриши нашу скорбь; Радуйся, помогаеши нам, яко немощным, окормляеши нас, яко странных; Радуйся, яко не имамы иныя помощи, разве Тебе, ни иныя Предстательницы; Радуйся, яко не имамы Благия Утешительницы, токмо Тебе, о Богомати! Радуйся, яко да сохраняеши нас и покрываеши во веки веков; Радуйся Пренепорочная Богородице Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 2

Видящи милосердие Твое неисчетное, Всенепорочная Владычице, и многая чудеса, Тобою явленная и присноявляемая чрез Святыя иконы Твоя, имиже, яко звездами богосветлыми, весь мир христианский украсила еси, величаем Тя, возвеличившую род наш Твоим благоволением, и с любовью припадаем к Чудотворному Образу Твоему, поюще Сыну Твоему Христу Богу: Аллилуиа.

Икос 2

Видеша все вернии люди Киевския, яко Святыи образ Божия Матери чудесно отобразися на стекле кивота, зело удивишася и с благоговением взирающе на цельбоносную икону телесныма очима, потщася сие возопити Честнейшей Херувим и Славнейшей без сравнения Серафим: Радуйся яко Образ Твой Честный предивно, без содействия рук человеческих на стекле кивота отобразишася; Радуйся, всех верных явлением сим зело возрадовавшая и умилившая; Радуйся, Пречистая, призирая на смирение, слышиши глас наш и вся очищаеши беззакония наша; Радуйся, Дево, мертвѣ змиѣ живоносным Рождеством Твоим соделавшая; Радуйся, Богородительнице, жизнь нестареющую улучшить нам помогаеши молитвами Твоими; Радуйся, Слово Отчее рождающая, пламень страстей наших рососою молитв Твоих погашающая; Радуйся, Благая Утешительнице, Матерними молитвами Твоими бури сердец наших утишающая; Радуйся, исправляя молитвы рабов Твоих, разрешение многих наших прегрешений подающая. Радуйся, Пренепорочная Богородице Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 3

Сила Вышняго содела Тя, Благодатная, источник неоскудевающ утешения бедствующим. Мнози бо скорби, претерпевши, можеши и искушаемым помощи. Людем же нашим, люте страждущим от неверия и заблуждения, благоволила еси милостивно явити благодатное сокровище сие – Чудотворный Образ Твой, - во храме Свято-Введенском в знамение милости Твоея ко земле нашей, в защиту от враг видимых и невидимых, тем же помощию Божиею подкрепляеми, Спасителю Богу поим: Аллилуиа.

Икос 3

Якоже древле царь повеле при Тихвинской иконе братии поселиться и славу, Тебе Пречистей, воспевати и о всем мире молитву приносить. Тако и ныне повеле митрополит Владимир обители быти и братиям собравшимся пред Твоим новоявленным чудным образом моления о всех людях приносить и воспевати Ти:

Радуйся, освятившая землю киевскую Своим явлением;
Радуйся, утесняемым ослабу и свободу дарующая;
Радуйся, ненаказанных Милостивая Наказательнице;
Радуйся, неразумных Премудрая Вразумительнице;
Радуйся, обидающих Всегрозная Устрашительнице;
Радуйся, обидимым Всеблагая Заступнице; Радуйся, духа уныния и боязни отгнание.
Радуйся, Пренепорочная Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 4

Яко лучезарную звезду, яко новое знамение милости Своя явила еси ныне, Пренепорочная Дево, верным богоспасаемого града Киева, честную икону Твою «*ПРИЗРИ НА СМирЕНИЕ*» в годину новых испытаний, нестроений и злых развращений врагами веры и Отечества нашего воздвигаемых, да утвердятся благочестие и да укрепится вера православная в людех. Мы же в сем явлении уразумев знамение велия попечения Божия о месте сем, со трепетом и благоговением глаголем Ти, Царице Небесе и земли: «Ты еси нам щит непобедимый и стена неодолимая» восхваляющих Тя и воспевающих Богу песнь: Аллилуиа.

Икос 4

Слышавше о дивном чудеси явления Святыя иконы Твоея во граде Киеве, преблагословенная Царице Неба и земли, вси людие подвигошася во храм Твой взирающе и дивяще чудеси сему и со благоговением и радостью поклоняшеся Чудотворному Образу Твоему и хвалебне зовуще Ти:

Радуйся, Обретшая благодать у Бога и больше Ангелов и всех святых возвеличенная;
Радуйся, Мати Божия, крепкаго во бранех Христа рождшая, избавляющая нас от печалей и лютых нападений вражиих;
Радуйся, рождшая Живодавца Христа несказанно, мертвых нас душами оживотворяющая; Радуйся, Владычице, освящающая оскверненные сердца наша, яже Пресвятое Слово рождшая.

Радуйся, Милостивая, простирающая нам руку помощи, да спасаемая, выну ублажаем Тя; Радуйся, Дево Богородованная, кроплением милости Твоея погашающая угли страстей наших; Радуйся, угасший светильник сердец наших возжигающая;

Радуйся, сотворяющая милостива нам Судию, Сына Твоего;
Радуйся, нечистых страстей нас свободяющая и славы вечныя сподобляющая.
Радуйся, Пренепорочная Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 5

Егда явися чудо от иконы Твоея, вернии возрадовашася, а невернии удивляхуся “како сие может быти” и изучаху сие и познаваху силы Пречистыя и по недолзе времени возгласиша привселюдно яко сие нерукотворно быша, мы же паки и паки милости Твоей дивляхуся, яко да нашу недостойную молитву призрит Господь, Царь Славы и послушает прошения всех с верою призывающих имя Твое Святое, и Сыну же Твоему зовущих: Аллилуиа.

Икос 5

Возсия нам благодать светозарная от чудотворныя иконы Твоея, Богоизбранная Отроковице, пред Нею же со слезами припадающе, молимтися: отжени облак нашедших на ны искушений и бед, да вопием Ти радостно:

Радуйся, Всепетая, Дверь Небесная, отверзающая нам дверь спасения;
Радуйся, Чистая, руку помощи нам простирающая и из глубины болезней возводящая;
Радуйся, Святейшая, свет Невещественный рождающая, тьмы страстей нас освобождающая;
Радуйся, Ангелов Радосте, праведников Доброта, верных Надежда и наше соблюдение;
Радуйся, Мосте к Жизни Несостареющейся приводящий, верою и любовью Тя величающий;
Радуйся, возносящая рог верных, поющих Тя, Дево, и поклоняющихся честному образу Твоему;
Радуйся, наставляющая к добродетели Небесного Царствия и покоя Божественного;
Радуйся, руку помощи нам подающая и ко пристанищу спасительному направляющая.
Радуйся, Пренепорочная Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 6

Проповедник неизреченных чудес Твоих, Мати Божия, явился святыи храм Твой во граде Кieve, в нем бо дивное Божие смотрение о нас Тобою, дево чистая, исполнися. Егда сокровенное желание сердца нашего украсить пречудный лик Твой, Царице Небесная, драгоценным венцем из камней честных, милостивно услышала еси. Нас же грешных и недостойных, прилежно притекающих к преславному образу Твоему, в покаянии зовущих из глубины души: “Владычице, спаси ны погибающая от множества прегрешений наших, да выну благодарим и величаем Тя, нашу скорую и дивную помощницу, поя Богу: Аллилуиа”.

Икос 6

Якоже древле иудеи для скинии приношаху злато и сребро, тако и людие наши получаху Тобою исцеления, благодаряще Тя, приношаху Ти сребро и злато, Пречистая Скинии, и по сем образ Твой Святыи украси благолепными дары ризою драгою и венцем, припадаем Ти и со слезами вопием тако:

Радуйся, богородице Дево, и рождаеши, и чиста по рождестве явилася еси;
Радуйся, Благая, дух сокрушения и смирения сердец нам подающая, уму же чистоту и житию исправление;
Радуйся, Всенепорочная, прегрешений оставление и слез источники нам дарующая;
Радуйся, силою молитв Твоих язвы душ наших исцеляеши;
Радуйся, Чаше жизни и безсмертия, ко вратам вечныи жизни нас приводящая;
Радуйся, Избавляющая нас от многих бед, скорбей и будущаго Суда Страшнаго;
Радуйся, Живоносный Источниче нетления и радости, жаждущия души наша напоющая;
Радуйся, Всемиловитая, кротким сиянием Твоим мрак страстей и пророков наших разгоняющая.
Радуйся, Пренепорочная Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 7

Хотяи долготерпеливый Господь явити Своего Человеколюбия неизследимую щедрот бездну, избра Тебе Едину в Матерь Себе и сотвори Тя людем непреодоленное защищение: да кто от них праведным судом Божиим осуждения достоин явится, Твоим обаче державным покровом сохраняется на покаяние, зовый: Аллилуиа.

Икос 7

Новая купель Силоамская паче оныи древния, явился, Пречистая Владычице, храм Святаго Введения Твоего, в нем же вси вернии поклоняются чудотворной иконе Твоей и молебныи пения выну пред Тою совершают, да не сокрыт будет источник благодатных врачеваний всем требующим. Сего ради мы не таим Твоих благодеяний, Всенепорочная, но благодарственне вопием: Радуйся, Агнице, рождающая Агнца, вземлющего грехи мира;
Радуйся, красна душою, красна телом, красна помышлением, Дево Пречистая, скверну душ наших очищающая;
Радуйся, всех Освященная Сене, исцеления от дланей Твоих точающая нам выну;
Радуйся, Виноград Божественный, Красный Грозд израстившая, душам нашим дающая питье независтное;
Радуйся, Реко Приснотекущая исцелений в Море, вся наша страсти потопляющее;
Радуйся, Единая Нетленная, в земном житии сем покровом милости Своея нас покрывающая;
Радуйся, яко матерними молитвами Твоими избавляемся болезненных напастей и всякаго вреда душевнаго и телеснаго;

Радуйся, Всеблагая наша Наставнице, за вся благодеяния Твоя благодарению нас научающая.

Радуйся, Пренепорочная Богородице Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 8

Все житие наше на земли болезненно и печали исполнено от клеветы, досаждения, укорения и иных многовидных бед и напастей; немоществует бо тело, изнемогает и дух наш. К Тебе убо прибегаем, Благодатная, пред Пречистым образом Твоим припадающе: исполни радости и веселия скорбныя сердца наша, да вопием выну Богу: Аллилуйа.

Икос 8

Странное видение бысть человеку некоему, егда стоя на молитве и за сродницу без покаяния почившую, молитву приносяща, внезапно узре Святый образ Твой, Владычице, на стене явленный, а посем на том же месте саму почившую виде, небесною радостью осиянную. В видении сем уразумев Тя, Матерь Света, в Вышних пребывающую и ходатайства за живых и мертвых Сыну Твоему выну приносящую, исполнися духовныя радости и веселия скорбное сердце его и возопи таковая:

Радуйся, от приносящих Тебе благодарныя дары лика Твоего не отвращающая, и почившим сродникам их загробную участь облегчающая;

Радуйся, уповающим на Тя живота непостыдный конец дарующая;

Радуйся, и по смерти за отшедшую на суд Господень душу пред Сыном Твоим неотступно ходатайствующая; Радуйся, скорбящих родителей в лишении чад их утешающая благодатною Твоею помощью;

Радуйся, неустанная Молитвенница наша, тихий и безболезненный отход из сей юдоли плача и скорби нам низпосылающая;

Радуйся, в грозный час смерти за верно чтущих Тя предстательствующая и от воздушных мытарств избавляющая; Радуйся, Милостивая, милость Свою нам являющая в день испытания, в оньже откроются вся дела наша добрая же и злая;

Радуйся, Милосердая, покаяния грешников не отвергающая и от рова погибели милосердием Твоим исхищающая. Радуйся, Пренепорочная Богородице Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 9

Все естество ангельское похвальная песни приносит Тебе, истинней Матери Божией и Заступнице всех приходящих к Тебе и просящих Твоея помощи, яко твердым и крепким Твоим предстательством праведных веселиши, грешных заступаеши, печали утояеши, сродником нашим почившим загробную участь облегчаеши, и молишися о всех нас, верою зовущих Сыну Твоему: Аллилуйа.

Икос 9

Человечестии ветии суемудрению недоумевают познати Божественную тайну Твоего Приснодевства, Богородице, ниже могут изъяснити силу чудотворную от икон Святых Твоих проистекающую, во исцеление недужных и на всякую пользу душевную и телесную человеком. Мы же благочестно, Матерь и Деву, Тя исповедающе, достойно хвалим славный, Владычице, иконы Твоя праздник, верно поклоняемся образу Твоему Святому и с любовью вопием: Радуйся, Богоневесто, Свет рождающая Божественный и Превечный;

Радуйся, Мати и Дево Препоблагословенная; Радуйся, матерей присное радование;

Радуйся, Едина Непорочная и Добрая в женах;

Радуйся, Ангелов Славо, Столп утверждения и Сокровище спасения;

Радуйся, Царице Небесная, источник нетления и дверь покаяния;

Радуйся, благосердая Мати всех скорбящих и обремененных;

Радуйся, Державная Заступнице рода христианского.

Радуйся, Пренепорочная Богородице Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 10

Спасителя падшему человечеству родила еси, Всенепорочная Дево, и Сего, яко Младенца во объятиях Твоих носила еси.

Егоже Божественное изображение на честней иконе Твоей нам являеши и многая милости и щедроты Твоя нам даруеши. Сего ради с верою и любовью чествуем образ Чудотворный твой, Владычице, и молимся Тебе прилежно: буди покров и защита нам в день Судный, да Твоим Матерним предстательством помилует нас Судия праведный, Сын Твой, и сподобит деснаго стояния и пения Ему со всеми избранными: Аллилуйа.

Икос 10

Стена и покров еси граду Пскову дадеся Святая икона Твоя, Царице и Владычице, многажды град сей от разорения ратного сохранила еси. И ныне нас грешных, и недостойных чад Твоих милостивно посетила еси чудным явлением Пречистаго Твоего образа и благоутробно приемлеши пред Ним возносимыя Тебе от благодарных сердец наших молитвы с пением таковым:

Радуйся, якоже древле иконою Успения славный град Киев многократно спасала еси, тако и ныне нас пречудною иконою Твоею от бед ограждаеши;

Радуйся, Лавры Киево-Печерския славная строительнице и храмов ея всечестная украстельнице; Радуйся, Хранительнице Дивная и иных обителей святых, яко Твоею благодатною силою оныя зиждятся и преуспевают в благочестии;

Радуйся, прославившая место явления иконы Твоея дивным чудодействием и всем милость преизобильную нам показавшая; Радуйся, Богоневесто Пречистая, святыи лик Твой чтущих от осуждения и мук многообразных избавляющая;

Радуйся, Многомилостивая Покровительнице наша, от пречудныя иконы Твоея милости нам неоскудно источающая;

Радуйся, Владычице, матерними молитвами Твоими души наша от мрачного сна восстанавливающая к Твоему славословию;

Радуйся, Радосте миру, яко о Тебе радуется ангельский собор и человеческий род. Радуйся, Пренепорочная Богородице Дево *ПРИЗРИ НА СМИРЕНИЕ*, с высоты небесной на смирение рабов Твоих призирающая.

Кондак 11

Пение молебное наше с верою и любовью возносимое, милостивно услыши, Госпоже Владычице, и утробу щедрот Твоих не затвори нам, Всещедрая Богородице: се бо обнищавше в добрых делах, к сокровищнице милости Твоея, - чудней иконе Твоей, - со усердием притекаем, Всеблагая, и припадающе к Ней, молимся: сохрани ны от тлетворных учений, избави от лукавых совращений, спаси Отечество наше от нестроений и злых нападений вражиих, и сподоби в любви и единомыслии со всеми верными чадами Святыя Христовы Церкви, благоприятно пети Создателю нашему песнь: Аллилуйа.

Икос 11

Светлыми лучами чудес немерцаемо сияет Святая икона Твоя, Всенепорочная Богородице Дево, просвещаеши бо нас, помраченных греховною мглою и приводиши к немолчному славословию Твоего Пресвятаго Имени. Тем же радуемся, мы грешнии, имуще таковой залог Твоего к нам благоволения, и Тебе, скорой Помощнице нашей, благодарственно взываем:

Радуйся, Царице и Владычице, светом Твоим небесным нас освящающая и под кровом Твоим выну сохраняющая; Радуйся, Благословенная и Препрославленная, Мати Неискусомужная, умерщвленная грехами души наша оживотворяющая; Радуйся, Чистая и Непорочная Дево, Ты бо родила еси Сына, избавляющего нас от искушений; Радуйся, Всеблагая Владычице Богородице, от всяких ны зол и скорбей исхищающая и нозе наша на камне божественнаго спасения поставляющая; Радуйся, Чистая Агнице, Дево, Мати, Отроковице, чисты ны сотворяющая от страстей телесных; Радуйся, яко да льстиваго избавляются сетей, вси песнословящия Тя, Богорадованная.

Радуйся, Гора Велия, Юже Даниил провиде, из Нея же Честный Камень, - Христос, - плотию облечеся; Радуйся, Дево Чистая, Жезл из корене Иеисеева, цветовозрастивши нам всесильного Господа. Радуйся, Пренепорочная Богородице Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 12

Благодати Божия Святое и Непорочное жилище, Мати Господа Вышних сил, не возгнушайся нас грешных и недостойных, воспевающих милости от всечестныя иконы Твоея нам явленныя, и Твоим невечерним сиянием озари наша темныя души, приводящи к Свету Трисолнечнаго Божества; в Православии укрепи нас, Всеблагая, и сподоби до конечнаго въздыхания нашего пети немолчную песнь Вседержителю: Аллилуйа.

Икос 12

Поюще песнь хвалы и благодарения Тебе, Богорадованная Дево, проповедуем велегласно величие чудес Твоих и богатство милости Твоея, на нас и Отечестве нашем явленных, и от глубины сердечныя приносим Тебе со смирением похвальныя дары сия:

Радуйся, Православия Несокрушимая Крепосте и Оградо;

Радуйся, Непобедимая Воеводо вождей и воинств христианских;

Радуйся, Неложное Спасение и Предстательнице мира, рождающая Зиждителя, Имже от напастей и болезней спасется мир; Радуйся, Мысленныя Двери Жизни, покаяния нам двери отверзающая; Радуйся, Едина Благословенная, в час смерти темныя зраки лукавых бесов далече от нас прогоняющая; Радуйся, Едина Милосердая, в страшный день Суда, вечныя муки нас избавляющая и неизреченныя славы Сына Твоего наследники ны показывающая;

Радуйся, всенепорочная, выну человеколюбие Твое являющая и от соблазнов и сетей вражиих нас свободящая;

Радуйся, Пречистая, Сотворившая с нами знамение во благо: да видят ненавидящие нас и постыдятся, яко Ты вняла еси прошениям нашим и утешила ны.

Радуйся, Пренепорочная Богородице Дево *ПРИЗРИ НА СМирЕНИЕ*, с высоты небесной на смирение рабов Твоих призирающая.

Кондак 13

О, Всепетая Мати Господа нашего Иисуса Христа, неисчерпаемое море Божественных даров, Ты еси, Всесвятая Дево! Яко светоподательную лампаду, елеем милости исполненную, созерцаем Тя очами веры и кротким сиянием Твоим озаряемы, любовию же Твоею присно согреваемии, Тебе, яко благой Заступнице нашей, со умилением глаголем: приими благоутробно молебное пение наше, пред Чудною иконою Твоею с верою Тебе возносимое, и всесильными молитвами Твоими умоли, Владычице, избавитися нам грешным временных бед и вечныя муки, да спасеннии Тобою прославим и в будущей жизни Всесвятое имя Сына Твоего и Бога нашего, верно зовуще Ему: Аллилуйа. (3 р.)

Тропарь, гл. 4

Необоримая стена образ Твой и источник чудес,/ якоже древле от Него заступление Твое граду Пскову даровала еси/ тако и ныны нас от всех бед и скорбей милостивно избави/ и спаси души наша/ яко любвеобильная Мати.

Кондак, гл. 3

Пренепорочная Дево, отображение Лица Твоего чтущия благодарные дары приемлещи, живым и мертвым помогаещи, град и страну нашу спасаещи, и пред Сына Твоего молитвы приносиши, и спасаещи всех нас.

Величание

Величаем Тя, / Пресвятая Дево/ Богоизбранная Отроковице/
и чтим святыя иконы Твоея чудесное отображение.

О, Пресвятая Госпоже, Дево Богородице, высшая Херувим и Честнейшая Серафим, Богоизбранная Отроковице! Призри с высоты небесной милостивным Твоим оком на нас, недостойных рабов Твоих, со умилением и слезами молящихся пред Пречистым образом Твоим; не лиши нас Твоего заступления и покрова Державного в странствии сем земном, многоскорбном и многомятежном.

Спаси нас в погибели и скорби сущих, воздвигни из глубины греховныя, просвети ум наш, омраченный страстями и уврачуй язвы душ и телес наших!

О, всецелая Мати Человеколюбиваго Владыки! Удиви на нас пребогатая милости Твоя, укрепи немощную волю нашу к деланию заповедей Христовых, умягчи окаменелая сердца наша любовью к Богу и ближним, даруй нам сокрушение сердечное и покаяние истинное, да очистившись от скверны греховныя, сподобимся мирных христианских кончины и доброго ответа на Страшном и нелицеприятном Суде Господа нашего Иисуса Христа, Ему же со Безначальным Его Отцем и Пресвятым, Благим и Животворящим Духом, подобает всякая слава, честь и поклонение, ныне и присно и во веки веков. Аминь.

